

續資治通鑑

冊罕

續資治通鑑卷第一百四十一

賜進士及第兵部尚書兼都察院右都御窳兵部尚書兼都等處地方軍務兼理糧餉世襲二等輕車軍務兼理糧餉世

宋紀一百五十三

起昭陽赤奮若正月盡逢攝提格十二月凡二

光宗循道憲仁明功茂德溫文臣曰漢人與夏

皇帝

乾道五年

金大定九年

春正月辛酉金主與宣徽使敬嗣

暉祕書監伊喇子敬論古今事因曰亡遼日屠食羊

二百豈能盡用徒傷生耳朕雖處至尊每當食輒思

貧民饑餒猶在己也彼身爲惡而口祈福何益之有

如海陵以張仲軻爲諫議大夫何以得聞忠言朕與

大臣論議一事非正不言卿等不以正對豈人臣之

道哉 庚午金詔諸州縣和糴毋得抑配百姓 甲

戊新知無爲軍徐子實陳屯田利害帝以其言可采
遂除大理正措置兩淮屯田官是月金命都水監

梁肅往視決河河南統軍使宗敘上言大河所以決
溢者以河道積淤不能受水故也今曹單雖被其害
而兩州本以水利爲生所害農田無幾今欲河復故
道不惟大費工役卒難成功縱能塞之他日霖潦亦
將潰決則山東河患又非曹單比也況沿河數州之
地驟興大役人心動搖恐宋人乘間搆爲邊患肅亦
言新河水六分舊河水四分今若障塞新河則二水
復合爲一如遇猛漲南決則害于南京北決則山東
河北皆被其害不若于李固南築隄使兩河分流以

殺水勢金主從之

（攷異）金史宗敘梁肅傳
俱不繫年今從河渠志

二月乙未

命楚州兵馬鈐轄羊滋專一措置沿海盜賊先是海

州人時旺聚衆數千來請命旺尋爲金人所獲其徒
渡淮而南者甚衆故命滋彈壓之 戊戌贈張浚太
師諡忠獻 庚子金以中都等路水免稅又以曹單
二州被水尤甚給復一年 壬寅以給事中梁克家
簽書樞密院事 甲辰以王炎參知政事 辛亥中
書舍人汪涓言中書舍人於制赦有誤許其論奏而
給事中又所以駁正中書違失各盡所見同歸於是
近年以來間有駁正或中書舍人給事中列銜同奏
是中書門下混而爲一非神宗官制所以明職分正
紀綱防闕失之意壬子詔自今詔令未經兩省書讀
者毋輒行給舍駁正毋連銜同奏 甲寅金詔女直
人與諸色人公事相關止就女直理問 三月丁巳
朔詔趣修廬和二州城 丁卯金命御史中丞伊喇

道廉問山東河南尚書省議網捕走獸抵徒罪石琚
曰以禽獸之故而抵民以徒是重禽獸而輕民命恐
非陛下意金主曰然自今有犯可杖而釋之 辛未
金禁民間稱言銷金條理內舊有者改作明金字

乙亥召四川宣撫使虞允文還陳俊卿薦其才堪將
相故也以王炎代爲宣撫使仍參知政事 丙子賜

禮部進士鄭僑等三百九十二人及第出身 辛巳

金以大明路諸明安民戶艱食遣使發倉廩減價糶
之 壬午賜洛陽郭雍號冲晦處士以湖北帥張孝

祥薦其賢召而不至也 淮西副總管王公述進對

帝曰到任應有事與郭振同深議淮甸義兵可依時
教閱不可久勞有妨種畊如修城竣工可同往逐州
軍按閱廂禁軍或見淮甸有興利事卽以聞 癸未

臣僚言國家置武學養士皆月書季考以作成之而武臣登第止許參選入監當錢穀之任銓部積壓猥多差遣艱得後雖許通注沿邊親民巡尉往往皆遠惡去處多不願受是故武臣及第之後所用非所養甚非朝廷教育作成之意請將前後武舉及第之人其間有兵機練達武藝絕倫可爲將佐者許侍從薦舉卽賜召對量材擢用或令注授屯駐諸軍機幕幹辦參贊軍謀庶幾有以激勸詔令監司帥臣管軍侍從已上薦舉 夏四月己丑金主謂宰臣曰朕觀在

位之臣初入士時競求聲譽以取爵位亦旣顯達卽徇默苟容爲自安計朕甚不取宣諭百官使知朕意 辛卯議者言楚州係極邊重地路當衝要州東地名鳧魚溝北接淮海與山東沿海相對宜將本州兵

馬鈴轄羊滋移往其地置廨舍警察姦盜元管海船
二百餘集搬運海州軍糧間探之類甚爲濟用其射
陽湖通濟地分闊遠闕官拘轄宜勅置使臣二員專
充管轄海船譏察淮海盜賊聽羊滋使令從之 壬
辰以梁克家兼參知政事 癸巳金遣使分詣河北

西路大名河南山東等路勸農 庚戌修襄陽府城

辛亥賑衢婺饒信四州流民 五月癸亥刑部侍

郎汪大猷言國家立保正之法願兼耆長者聽故數
十年來承役之初縣道必抑使兼充蓋保正一鄉之
豪官吏有須可以仰給故樂於竝緣以爲己利凡有
差募互相對糾請令諸路常平司相度或別有所見
可行者限一月條具來上本部參以見行條法立爲
定制從之 戊辰金尙書奏越王永中隨王永功二

府有所興造發役夫金主曰朕見宮中竹有枯瘁者
欲令更植恐勞人而止二王府各有引從人力又奴
婢甚多何得更欲百姓爾等但以例爲請海陵橫役
無度可盡爲例耶自今在都浮役久爲例者仍舊餘
竝官給傭直重者奏聞 詔後省官置言事籍看詳
臣僚士庶言事詳擇其可行者條上 是月金牒取
俘獲人王抃議盡遣時旺餘黨陳俊卿持不可帝然
之 詔有司議獄以法不得作情重奏裁 六月金
冀州張和等謀反伏誅 戊戌帝御便殿初帝御弧
矢以弦激致目眚至是始愈陳俊卿密疏曰陛下經
月不御外朝口語藉藉由臣輔相無狀不能先事開
陳以致驚動聖躬虧損盛德臣聞自昔人主處富貴
崇高之極志得意滿道不足以制欲則游畋聲色車

服宮室不能無所偏溺而不得爲全德之君陛下憂勤恭儉清淨寡欲凡前世英主所不得免者一切屏絕顧於騎射之末猶有未能忘者臣知陛下非有所樂乎此蓋神武之略志圖恢復故俯而從事於此以閱武備激士氣耳陛下誠能任智謀之士以爲腹心仗武猛之材以爲爪牙明賞罰以鼓士氣恢信義以懷歸附則英聲義烈不出樽俎之間而敵人固已逡巡震疊於千萬里之遠尙何待區區馳射於百步之間哉又曰古之命大臣使之朝夕納誨以輔德繩愆糾繆以格非欲其正君之過于未形唐太宗臂鷹將獵見魏徵而遽止憲宗蓬萊之游憚李絳而不行臣人微望輕無二子骨鯁強諫之節致陛下過舉彰聞于外今誅將及身而後言亦何補於既往之咎哉又

曰弓矢之技人所常習而易精然猶不免今日之患
況毬鞠之戲本無益于用武而激射之虞銜檠之變
又有甚於弓矢者間者陛下頗亦好之臣屢獻言未
蒙省錄今茲之失蓋天之仁愛陛下示以警懼使因
其小而戒其大也陛下試以弦斷之變思之則向之
盛氣馳騁於奔踶擊逐之間無所蹉跌蓋亦幸矣豈
不爲之寒心哉太祖皇帝嘗以墜馬之故而罷獵又
以乘醉之誤而戒飲遷善改過不俟旋踵此子孫帝
皇萬世之大訓也臣願陛下克己厲行一以太祖爲
法則盛德光輝將日新于天下而前日之過何傷日
月之明哉右諫議大夫單時亦上疏諫帝面諭曰卿
言可謂愛朕前此時爲侍御史嘗上封事言飲酒擊
毬二事帝大喜之詔輔臣曰擊毬朕放下多時飲酒

朕自當戒 金主以久旱命宮中毋用扇庚子雨

己酉以虞允文爲樞密使 是月賜孔璨官宣聖四

十九世孫也 秋七月乙卯朔金罷東北路采珠

乙丑以福建副總管曾覲爲浙東總管覲垂滿陳俊

卿恐其入預請以浙東總管處之虞允文亦言覲不

可留帝曰然留則累朕遂有是命 丙寅宰執請以

近日上書論邊事者悉送編修官擇其可行者與可

去者或可留存者各以其類相從置簿錄上以備佗

日采擇 八月甲申朔日有食之 己丑以陳俊卿

爲尙書左僕射虞允文爲右僕射竝平章事兼樞密

使制國用使俊卿以用人爲己任獎廉退抑奔競允

文亦以人才爲急嘗籍爲三等號材館錄故所用多

得人 乙未中書門下省言寺判丞簿學官大理寺

直密院編修之類謂之職事官朝廷所以儲用人才
比年以來往往差下待闕數政除授猥雜賢否混淆
何以清流品何以厚風俗望特降指揮令職事官須
見闕方得除人其已差人卻恐待次之久無闕可授
請朝廷稍復諸州添差釐正通判簽判教授屬官等
闕以處之佗時職事官有闕卻從朝廷於曾差下人
內選擇召用庶幾內外之職稍均朝廷紀綱稍正詔
從之 九月甲寅朔金罷皇太子月料歲給銀五萬
貫金主謂臺臣曰比聞朝官內有攬中官物以規貨
利者汝何不言皆對曰不知金主曰朕尙知之汝有
不知者朕若舉行汝將安用 丁巳中書門下省勘
會諸路監司近來多不巡按官吏貪惰無所畏憚間
有出巡去處又多容縱隨行公吏等乞覓騷擾理宜

約束詔諸路監司今後分上下半年依條巡按詢訪
民間疾苦糾察貪惰不職官吏仍具請實以聞如敢
依前容縱公吏等乞覓騷擾當實重典 己未新江
東運副程大昌朝辭帝諭曰近來監司多不巡歷朕
期卿徧行諸州察守令臧否民情冤抑悉以聞 壬
戌金主秋獵 甲子詔侍從臺諫集議欽宗配饗功
臣 丙寅起居郎林機論諸郡守臣欲郡計辦集而
不恤縣之匱乏以致橫斂及民帝曰甚不體朕寬恤
之意且如稅賦太重朕欲除減但有所未及當以次
第爲之機又曰諸處有羨餘之獻皆移東易西以求
恩倖帝曰今之財賦豈得有餘今後若有獻朕當卻
之 壬申詔三衙諸軍應有違軍律弊事統兵官特
與放罪差主帥措置日下盡行除勒其軍校有因教

閱損壞軍器官爲修補軍身務令飽不得多斂錢米
卻行減尅借差軍兵戰馬多破白直諸處窠役回易
私占官兵悉行拘收入隊教閱務須軍政整肅諸處
送到官員月給并應副索客及諸般名色陪斂減尅
陪填贏落以爲私用竝計贓論罪私借人馬亦計庸
科斷其違戾統制統領將佐從主帥按劾以聞當重
實典憲主帥失於糾舉亦重作行遣先是樞密院奏
國家撫養戰士全藉主兵官督責教閱以備緩急近
來三衙諸軍統兵官循習私意恣爲不公有害軍政
遂條具十一事乞行懲革故有是詔 命淮西安撫
司參議官許子中措置淮西山水砦招集歸正人墾
官田 是月復監司選本貫法 是秋令監司帥臣
臧否守令 太常少卿林栗等言竊惟祀帝于郊在

國之南就陽位也國家舉行典禮歲中祀上帝者四
春祈夏雩秋享冬報其二在南郊圓壇其二在城西
惠照院望祭齋宮蓋緣在京日孟夏大雩別建雩壇
於郊丘之左季秋大享有司攝事就南郊齋宮端誠
殿今城西望祭齋宮於就陽之義無所依據欲望詳
酌除三歲親祠自有典故外其有司攝事歲中四祭
竝卽圓壇以遵舊制從之續禮部侍郎鄭聞等言國
初沿襲唐制一歲四祭昊天上帝於郊丘謂祈穀大
雩享明堂祀圜丘也惟是明堂當從屋祭元祐六年
從太常博士趙叡之請有司攝事乃就齋宮行禮至
元符元年又寓于齋宮端誠殿竊見今郊丘之隅有
淨明寺請遇明堂親饗則遵依紹興三十一年已行
典禮如常歲有司攝事則當依元祐臣僚所陳權寓

淨明寺行禮庶合明堂之義從之 冬十月丁亥金

主還都 戊子賑溫台二州被水貧民以守臣不上

聞各降官落職放罷監司各降一官 庚子臣僚言

陛下臨御之初約束州縣受納苗米多收加耗法禁

嚴甚而近年以來所收增多逮朝廷拋降和糴卻以

出剩之數虛作糴到所得價錢盡資妄用乞戒州縣

杜絕弊倖庶寬民力從之 辛丑金以尙書右丞相

赫舍哩舊作紇石烈今改良弼爲左丞相樞密使赫舍哩志寧

爲右丞相詔宗廟之祭以鹿代牛著爲令 丙午金

大享於太廟 辛亥金以平章政事完顏思敬爲樞

密使 十一月癸丑朔復置淮東萬弩手名神勁軍

甲寅守起居郎兼權中書舍人林機論司馬光有

言君子以德勝才小人以才勝德之辨願陛下察之

帝曰朕於此未嘗不加察但恐有所未盡漢高祖名
知人謂陳平智有餘難獨任周勃重厚可屬大事蓋
得此道丁巳御書御製用人論賜宰臣陳俊卿等
己未林機言本朝慶歷三年歐陽修建言臣僚奏事
退令少留殿門候修注官出而錄聖語至七年王贊
始請只令備錄關報遂爲定制是以仁宗皇帝之朝
道德教化之源禮義刑政之具載在國史最爲詳悉
由史官得職也近世以來臣僚奏事例以不得聖語
爲報伏覩在京通用令諸進對臣僚有親聞聖語應
記注者限一日親錄實封報門下中書後省事干機
密難于錄報者止具因依申知又敕應記注事不報
門下中書後省者以違制論請降付兩省檢舉前件
條令庶幾得以大書特書垂信萬世詔檢見行條法